

鄧川州志

第三冊

鄧川州志卷之六

署牧烏程鈕方圖賡雲定

州人

楊柄銓春樵輯
侯允欽雲坡纂

建置志

古者度地居民必建城邑營宮室置倉廩立學以教設
兵以守罔非爲民也鄧於漢初爲櫟榆地桐師以東皆
編髮隨畜爲遷徙自蒙氏立學段氏求經雖知嚮風未
入版圖迄元啓疆明繼之至我

朝而教化大行與中州埒蓋

國家二百年之涵濡與賢將相督撫監司之經綸雷雨於

南滇者極之僻壤荒陬莫不綱陳而紀肅則後此之情
殷懷保者內修政教外謹藩籬不且念締造之艱而益
綢繆於未雨也哉

城池

鄧川州城遷徙者屢矣蒙段氏無足論自元代入版圖
設鄧川州治於中所明洪武十七年遷玉泉鄉成化間
圯於潦乃遷象山麓隆慶間知州周公文化築之旋沒
於沙知州鍾公大章遷於來鳳岡無城天啟間徐公保
泰遷於德源城無水崇禎十四年敖公澐貞遷鄧川驛

塹城以土背繞山半

國朝因之乾隆二十八年知州汪公斌截去繞山者甃址

以石墻以磚周三里七分高一丈五尺厚五尺東門曰

德源西曰景徽北曰觀化南曰敷澤城樓東偏曰玉案

迴環西曰文明啟始北曰江煙映日南曰龍關擁翠然

已坍塌不能修又南門外借西溪水轉東折北爲池水

挾沙至溪底昂於麗譙矣

論曰築城鑿池慎固封守之道也昔吳牟尋擊吐蕃

謂鄧當寇衝峭山深塹以爲之備今則承平日久守

險不事卽向之所謂嬰堞帶渙者亦聽其荒頽剥落
焉無他數易則制儉數勞則力疲要皆陽侯之厲爲
之也竊嘗陟嶺降原求一可以經久之地而不得無
已其大邑士登間乎枕山帶海形勢頗稱兼無四山
積潦之虞姑記之以質諸後來若世傳大澗水入蓮
花池州基復舊之說殆難遽信

公署

州署城西南坐未向丑中爲大堂二堂三堂後爲內室
內室兩旁爲廂三堂右爲書齋三堂左旁爲廳廳後爲

庖廩後爲箭道箭道西爲箭亭三堂前爲涼亭二堂左爲簽押房二堂左廂爲茶房右廂後爲馬廐馬廐後爲倉房近大堂內右側西向爲客廳外左側東向爲案牘神祠大堂前爲龍亭左右爲六房吏舍龍亭外爲儀門儀門外左爲吏目署爲土地祠右爲監獄前爲大門爲照壁

按道光二十五年十月間地震大堂內廳舍半圯二十六年六月署州胡公道駿詳請借廉捐修大役民力二十七年署州楊公爲翰建箭道內箭亭又按舊

登州府志 卷六 三
志乾隆初年知州唐公世梁鐫陳搏所書福壽二字
於石砌諸儀門墻謂能避水火又舊有戒石亭在大
堂後申明旌善亭在大門外今皆廢

儒學學正署在州署右中爲明倫堂爲習教軒右爲正
房正房左廂爲厨正房前爲廳大門右側爲書吏房
訓導署在學正署左中爲正房翼以兩廂前爲敷教堂
後爲菜園

吏目署在州署大門內左轉中爲堂後爲室堂後北向
爲客廳南向爲書房

按兩學吏目署俱於二十五年地震後與州署同時捐修

汛防署舊在北街久圯以清明坊官鹽店爲署

校場在德源城無廳舍荒岡耳

公館舊有察院行臺今改爲宏文書院

驛舍在南街今廢

論曰公署者出政之地上以布

朝廷之德意下以拊閭閻之疾苦民生係焉國本寓焉貪廉循酷判焉豈惟是棲遲偃仰高語黃紬放衙已

哉况鄧之爲邑回夷雜處河役繁興其待區畫於官
長者尤倍於他邦豈第君子民之父母不禁望琴堂
而三致意矣

倉儲

常平倉在州署右南建倉神祠東西北爲厰額貯常平
倉穀京斗九千石又貯條銀扣存穀八十四石八斗一
升四合四勺除前續兩次清查案內奏準豁免及奉文
咨追之短缺穀石外實貯倉穀三千七百二十五石零
五升一合八勺

按常平倉因穀價輕重爲糶糴使穀價常平始於漢
盛於宋 國朝康熙庚子年山東巡撫佛倫奏請積
穀備荒畝征四合下其法於直省至癸卯而各省倉
儲已足此各州縣常平倉穀所由積也

社倉有六在所右所青索百厚營長官村者廢惟千
戶營尙存穀六百十二石二斗四升耳

按社倉之法髣髴朱子康熙雍正間疊飭直省舉行
至乾隆五十年復經御史朱續暉奏請飭辦欽奉

諭旨聽民自行經理

論曰鄧多水患殷富不及東南苟遇凶荒必資賑濟
然賑濟之政莫善於常平社倉二法蓋常平掌於官
附郭之天災有備社倉立於社鄉村之饑饉無虞法
良意美舉其廢而普其澤是在念切民瘼者

學校

文廟建始於元代在中所會真寺後明洪武十七年遷玉
泉鄉州治右成化十四年沒於沙水二十二年巡按郭
公紳蒞境檄建象山麓提學僉事何公俊司業羅公欽
順各爲記崇禎四年知州徐公保泰因水患遷鼎勝山

地就荒僻旋圮

國朝康熙二十六年知州何公琛捐俸同儒學周道治段
縊遷城南又壞於溪水乾隆十六年知州蕭公克峙始
遷來鳳岡關山切五大級最上建大成殿五楹殿後稍
左建

啟聖祠三楹殿左右建東西廡各七楹墀中敞平臺爲
拜跪地次建大成門三楹門左爲名宦祠右爲鄉賢祠
祠右爲更衣所又次建石坊曰金聲玉振宮牆週遭繚
以垣垣之東北隅門曰禮門東南隅曰義路下盡平地

爲照壁照壁外爲泮池蕭公及邑人郭煥均有記道光
三年署州李公文培捐廉重修葺

書籍桂林陳文恭公爲方伯時頒發 御纂周易

折中壹部 欽定書經傳說彙纂一部詩經傳說

彙纂一部春秋傳說彙纂一部禮記義疏一部儀禮義

疏一部周官義疏一部綱鑑正史約一部大學衍義一

部近思錄一部古文淵鑒一部斯文精粹一部呂子節

錄一部貯學正署內

文廟經費乾隆年間知州蕭公克峙置田二十九坵坐落

沙橋甸十二坵赤壁甸二坵馬甲邑一坵彌勒甸一坵
高家村三坵土宮溝四坵團山一坵中前所二坵中所
一坵下山口二坵共稅糧一石五升七合條銀九錢四
分公件五錢六分四釐每年收荳穀租二十二石五斗
八升除完糧外作香燈費道光二十二年續置田八項
坐落小站後二項山灣二項白雙溪二項棗兒樹營門
首二項龍竹樹下二項共秋稅糧一石二斗六升每年
收穀租五十五石除完糧外作歲修費

書院在城北街舊名育材今改宏文各鄉義學有八在

中所曰登龍西館登龍東館在兆邑曰聯雲館在青索
曰毓英館在元井村曰玉泉館在龍王廟曰養正館在
羅川曰羅俊館在銀橋曰登瀛館

按書院義學俱係雍正年間陳文恭公所檄建者宏
文書院舊置館穀六十石在癩石坡道光丁未年署
州楊公爲翰以燕支果山田撥入登龍原屬一館嗣
分東西各置租五十三石五斗在小中所團山千戶
營百戶營聯雲館置租四十八石在平壩姜營毓英
館置租四十八石在千戶營齊兒樹玉泉館置租三

十八石在白雙溪養正館置租二十石在百戶營羅
俊館置租二十石在財豐村登瀛館置租四十石在
銀橋計各館租穀除完糧外餘息胥作脩脯

學額雍正二年題準每歲科試各取附生二十名廩膳
生共三十名增廣生三十名每歲試取武生十五名其
歲貢生三年二人禮生十二人

按 文廟祭器樂器俱應詳列以昭慎重然製造簡
陋未能如禮虛紀之失實矣後此禮修樂明肅將祀
事非讀聖人書被聖人澤者之責而誰責哉

登人少元
論曰 國家化洽菁莪自成均以迄郡縣莫不建學
置官廣增博士下逮鄉校亦復閭閻秩秩釋耒橫經
可謂盛矣邑雖遠處滇南近歲以來領鄉薦捷南宮
頗不乏人然後知學校之陶鎔爲最捷也擴而充之
鵝湖鹿洞之風奚遠耶

兵防

大理城守營分防外委一員乾隆三十年改設把總額
兵七十名道光初年新疆用兵裁撥十名實設戰兵十
八名守兵四十二名分汛各塘